

प्रादेशिक समाचार
आकाशवाणी जैपुर-अजमेर
दिनांक 17.05.2012
समय 18.50

- जैपुर रा जलमहल री लीज खारिज करबा रो राजस्थान उच्च न्यायालय रो फैसलो ।
- सूफी संत ख्वाजा मोइनुद्दीन हसन चिश्ती रा 800वां सालाना उर्स री अनौपचारिक सरूआत ।
- राजसमंद अर अलवर जिलां मांय छः खान मजूरा री मौत ।
- तापमान मांय गिरावट रै बावजूद राज्य मांय गर्मी रो असर जारी।

राजस्थान उच्च न्यायालय जैपुर रा जल महल री जमीन राज्य सरकार नै पाछी लोटाबा रा निर्देश दिया है। मुख्य न्यायाधीश अरुण मिश्रा अर न्यायाधीश महेश भगवती आज एक जनहित याचिका माथै फैसलो सुणाता थका जल महल री 100 एकड़ जमीन माथै कर्या गया निर्माण नै हटाबा रा निर्देश दिया। प्रार्थीपक्ष रा अधिवक्ता ए. के. जैन बतायो कं अदालत कह्यो है कं झील रा बिगड़िया हुया मूलस्वरूप नै पाछो चौखो कर्यो जावे।

अजमेर मांय सूफी संत ख्वाजा मोइनुद्दीन हसन चिश्ती रा 800वां सालाना उर्स आज झंडा फहराबा री रस्म रै साथै अनौपचारिक रूप सूं सरू व्हेग्यो । चांद दिखाई देबा माथै उर्स री औपचारिक सरूआत 21 या 22 मई सूं व्हेला। उर्स मांय भैळा होबा रै साथै 575 सदस्यां रा पाकिस्तानी जायरीन रो जत्थो 23 मई नै अजमेर पूगला। इण री वापसी 31 मई नै व्हेला।

उदयपुर री झीलां नै पूरा बरस भर्यो राखबा अर जिला रा 104 गांवां मांय पाणी पूगाबा रै वास्ते बणाई गई मोहनलाल सुखाड़िया जल डायवर्जन परियोजना रो काम इण बरस रै आखिर ताणी पूरो होबा री आस है। एक रपट ।

भारत संचार निगम लिमिटेड रै मुजब मोबाइल टावरां सूं लोगां नै विद्युत चुम्बकीय रेडिएशन रो कोई खतरा नीं है । बीएसएनएल रा मुख्य महाप्रबंधक प्रदीप कुमार अग्रवाल आज जैपुर मांय खबरनवीसा नै बतायो कं शहरी अर ग्रामीण हलका मांय थापित टावरां री जांच मांय पायो गयो कं विद्युत चुम्बकीय रेडिएशन 20 मीटर री सीमा मांय है अर इण सूं लोगां नै कोई हानि नीं व्हेरी है । बतायो जावे है कं मोबाइल टावर री वजह सूं कैंसर होबा री जाणकारी रै पछै जैपुर मांय थानीय नागरिक इण रै विरोध री सरूआत कर दी है।

हिन्दी अर राजस्थानी रा जाण्या-माण्या गीतकार गजानंद वर्मा आज देवलोक व्हैग्या ।
मुख्यमंत्री अशोक गहलोत कह्यो कं साहित्य जगत मांय वारी ठोड़ कोई नीं ले सकैला ।

प्रदेश मांय आज दो न्यारा-न्यारा हादसां मांय छः लोगां री मौत व्हैगी । राजसमंद रा
झांझर खनन हलका मांय एक मार्बल खदान मांय मार्बल ब्लॉक रै नीचे दब जाबा सूं तीन
मजूरा री मौका माथै मौत व्हैगी । बटै अलवर जिला रा भिवाड़ी हलका मांय चूहड़पुर
गांव मांय पत्थर री खान ढह जाबा सूं तीन मजूरा री दब जाबा सूं मौत व्हैगी ।

प्रदेश मांय आज थानीय निकायां अर ग्राम पंचायतां मांय खाली पदां रै वास्ते उपचुणाव
शांतिपूर्वक पूरो व्हियो । चूरु नगर परिषद अर जिला रा छापर नगरपालिका मांय वार्ड
पार्षदां रै वास्ते व्हिया उपचुणाव मांय मतदातावां मांय घणो उछाव देख्यो गयो ।
धौलपुर री नगला खरगपुर ग्रामपंचायत मांय आज सरपंच रै वास्ते व्हिया उपचुणाव मांय
85 फीसदी मतदान व्हियो ।

राज्य री पर्यटन मंत्री बीना काक आज आपणी निजी यात्रा माथै भरतपुर रा केवलादेव
घना पक्षी अभयारण्य पूगी । अठै रा एहलकारां सूं चर्चा रै पछै श्रीमती काक खबरनवीसा
सूं बातचीत मांय कह्यो कं राज्य सरकार वन अर वन्यजीवों रा संरक्षण रै वास्ते
कटिबन्ध है । वणा कह्यो कं चम्बल रो पाणी मिलबा सूं घना पक्षी विहार री तस्वीर बदळी
है अर ऑफ सीजन मांय भी अठै घणी संख्या मांय पक्षी मौजूद रेहेवे है ।

राज्य सरकार कोटा अर जोधपुर मांय सिटी बसां चलावेला । इण रै वास्ते 20 करोड़
रिप्या खर्च किया जावैला । नगरीय विकास महकमां रा सचिव जी एस संधु बतायो कं
जोधपुर मांय 39 अर कोटा रै वास्ते 33 बसां खरीदी जावैली । इण बसां रो संचालन
जोधपुर मांय जोधपुर विकास प्राधिकरण अर कोटा मांय नगर विकास न्यास कानी सूं
किया जावैला ।

जैपुर मांय आज सूं कुवैत सांस्कृतिक सप्ताह मनायो जा रियो है । इण रै तैत आज
जवाहर कला केन्द्र मांय उस्ताद नाजिम हुसैन रो शामे गजल कार्यक्रम व्हैला । काले सूं
कुवैत री संस्कृति माथै एक प्रदर्शनी लगाई जावेला । इण दौरान कुवैत रा टीवी बैण्ड
सांस्कृतिक री प्रस्तुति भी देवेला ।

राज्य मांय पशुपालकां रा पशुवां रा ईलाज री चौखी सुविधा मुहैया करावण रा लगस सूं
नया पशु चिकित्सा उपकेन्द्रां अर जानवरां रा सफाखाना चलाबा रै वास्ते 1200 पद मंजूर
कर्या गया है । पशुपालन निदेशक बतायो कं नुवा पशु चिकित्सा उपकेन्द्रां रे वास्ते 400
पशुधन सहायकां अर 400 जलधारी रा पद अर पशु सफाखाना रै वास्ते 200 पशु
चिकित्सा एहलकार अर पशुधन रै वास्ते 200 पद मंजूर कर्या गया है ।

राज्य मांय काले रा मुकाबले तापमान मांय 2 सूं 3 डिग्री ताणी री गिरावट रै बावजूद गर्मी रो असर बरकरार है । कोटा मांय आज सब उं बत्तो 42 दशमलव 4 डिग्री सैल्सियस तापमान दर्ज कर्यो गयो । इण रै अलावा श्रीगंगानगर मांय आज बत्तो तापमान 42 दशमलव 2 डिग्री सैल्सियस रियो जो काल सूं साढे तीन डिग्री कम है । म्हाकां खबरनवीस रै मुजब तापमान मांय कमी रै बावजूद जिला मांय गर्मी रो असर बरकरार है ।

जैसलमेर अर बाड़मेर मांय आज बत्तो तापमान 41 अर जैपुर मांय 40 डिग्री सैल्सियस दर्ज कर्यो गयो । चूरु मांय आज बत्तो तापमान 39 दशमलव 5 डिग्री सैल्सियस हो । म्हाकां खबरनवीस रै मुजब बठै गर्मी रा असर सूं जनजीवन गडबडायो है ।

मौसम महकमां रै मुजब लारला 24 घंटां मांय राज्य मांय कुछेक ठोड़ा मांय आंधी अर मेघ गरजन रो अन्दाजो है ।

अबै जिला सूं मिली दूजी खबरां रौ सार—

- बून्दी जिला रा नैनवा शहर मांय आज एक बाड़ी मांय 8 मोर मर्या हुया मिल्या । पोस्टमार्टम रपट रै मुजब आ री मौत जहरीलो दाणो खाबा सूं व्ही ।
- करौली जिला रा नादौती मांय राजीव गांधी सेवा केन्द्र मांय आज निःशुल्क चिकित्सा शिविर राख्यो गयो । शिविर मांय नाक, कान अर गळा रा रोग सूं जुड्या रोगियां रो ईलाज कर्यो गयो ।
- करौली मांय आज अनुसूचित जाति, जनजाति आरक्षण मंच रा हैला माथै पदोन्नति मांय आरक्षण बणाया राखबा री मांग नै लेर जिला कलेक्टर नै प्रधानमंत्री रै नाम पानड़ी सूपी ।
- झुंझुनू जिला मांय जिण काश्ताकारां री फसल पाला री वजह सूं खराब व्हेगी री वारो बिजळी रो बिल माफ कर दियो गयो है ।
- चित्तौड़गढ मांय दो ठोडा माथै पुलिस तीन लोगां नै गिरफ्तार करने 7 किलो अफीम बरामद करी ।
- झालावाड़ जिला रा भवानीमण्डी, सुमेर अर पिड़ावा कस्बा मिठाई री दुकाना उं नमुनां लेवण रा विरोध मं आज बन्द रिया ।
